

滿漢大臣列傳

卷五

阿思哈

福

祿

富明安

舒赫德

阿思哈薩克達氏滿洲正黃旗人雍正四年由官學生考授內閣中書遷侍讀洊擢刑部郎中軍機處行走乾隆十年擢甘肅布政使十四年擢江西巡撫十五年三月疏言各營演放連環鎗礮上用火藥須將鉛子裝放演練庶免臨時倉卒馬原備騎兵衝突各營恐兵偷減料草多委員朋餽惟合操日令馬兵騎射一二次應令自餽俾人馬相習至技藝惟當純熟得用步法架勢不必朝更夕改

上嘉其所言得要九月調山西巡撫十六年疏報平陽府災未親往撫卹

詔責之十七年十月疏報蒲解等屬被旱徧災平陽紳耆捐銀解河東道庫爲加賑之用

諭曰此奏殊屬卑鄙錯謬之至朕實駭聞直省偶遇徧災地方殷實之家樂善好施或自出家廩積貯或出己資糴運米石散

給貧民功令原所不禁惟具數報官量加優敘以爲閭閻任卹者勸耳並非歛貲貯庫藉以助賑也國家賑濟蠲緩重者數百萬兩少亦數十萬兩悉動庫帑正項從無顧惜地方富戶所捐幾何貯庫助賑殊非體制此端一開則偏災之地貧民既苦艱食富戶又令出貲國家撫卹災黎何忍出此深負朕恫瘝一體之意阿思哈著交部嚴加議處所捐銀兩著發還聽該紳衿等自行辦理復

諭曰阿思哈不勝巡撫之任著來京候旨尋部議革職十二月授吏部員外郎二十年三月

命以布政使銜往準噶爾軍營辦理糧運四月擢內閣學士七月議敘軍功加一級二十二年署江西巡撫先是江西軍丁自歸州縣編查殷實者多脫漏貧者將屯田典賣漕運幾致遺誤阿思哈蒞任卽設法清釐以舊冊詳核各丁族譜及保甲戶冊脫漏之丁及新生之丁登記無遺至二十五年奏查出軍丁二十七萬五千九百六十三其典賣屯田照直省分年減價回贖旗地例查契核定銀數令原丁措贖無力則責成運丁之□及

同族同船共贖回三百一十一頃又查出隱漏屯地九百二十五頃查設屯原以贍運而軍丁散居屯地皆招佃收租所入無多每船十年大造需費千兩每年運費數百兩皆散軍戶族津貼屯田有名無實臣酌將各船原有熟屯及贖回查出各田酌增餘租十一萬七千七百三十兩連原額租銀一萬二千八百八十七兩共十三萬六百有奇江西十四幫存漕船六百三十八隻除九江吉安建昌贛州等衛原有分貼費銀其餘均酌給餘租銀以爲造船起運之費並將贛衛餘租過多者撥濟撫饒等過少之衛四年委官編查一次軍丁無虞脫漏漕運藉裕轉輸疏入報

聞七月實授江西巡撫十一月江西學政謝溶生劾阿思哈婪賄派累

命尙書劉統勳侍郎常鈞會同兩江總督尹繼善往審鞫實擬絞二十六年

詔免罪給三品頂戴往烏魯木齊効力贖罪二十八年正月命往伊犁協同明瑞辦事六月授廣東巡撫十一月調河南巡

撫二十九年十月疏言河陰縣地僻事簡緊接滎澤請裁汰歸併滎澤縣管理增設巡檢一以資彈壓其原設教諭一應改爲河陰鄉學下部議行三十年三月疏言綠營例由步兵挑馬兵洊拔外委把總步兵內有弓箭鳥鎗藤牌礮手等項向例馬兵缺出止於弓箭馬步兵內拔補而鳥鎗兵不預是以兵皆習弓箭鳥鎗兵多庸陋請撥各標營馬兵缺十分之二爲馬鎗缺如步鎗純熟兼能馬鎗者准拔補馬兵兼令學射如馬上鎗射合式卽與弓箭馬兵一體考補外委把總則上有階升各思努力從之九月疏言衛河運道在在淺阻濬縣三官廟老鸛嘴等處砂礮挺據河心重船尤易疎虞向於衛河上下築草壩二十八以束水勢前撫臣胡寶瑑奏請疏挖並於淺處建草壩臣查衛河發源輝縣百泉南至新鄉縣之岔河尖與丹水合又百五十里經衛輝城北爲兌漕水次又東北至濬縣會淇水入湯陰內黃界受湯河洹河之水至直隸大名縣境入臨清河夏秋水盛無須草壩冬令源澁草壩亦屬無益不若於上游先期蓄水臨時開放得宜舊以河水兼濟民田有官渠民渠之別夫民田需

水多在春夏漕船起運則在秋冬農工已竣民田不須灌溉正可濟運現飭府縣督河員於九月望後起至漕船出境止暫閉外河以上民渠支港使水歸官渠並將官渠下游閉閘瀦水重運自可流通原建草壩之處應停止鑿去三官廟老鶴嘴等處砂礪其餘浮沙飭汛員集夫挑挖用刮板隨船疏濬使沙隨水蕩以利漕運十二月疏言河工料物向係沿河州縣領帑按畝派買民多苦累臣酌借司庫閒款銀官爲試辦代買代交於七八月間委員照應辦數日赴附近產料地方照時價豫給現銀約至十月各工開廠委佐雜監同交兌丞倅督察河員隨到隨收不敢稍有浮重承辦之員得以隨運隨交惟運脚等項及新料虛鬆應扣折耗計每稽料一斤除官價九毫糧戶應貼運費錢一文較之往年不及十分之一不數日間貼費盡完解司歸款料物比民辦早完月餘疏入均報

聞三十一年疏言辦理地方公事例取印結甘結稍不如式卽干駁換府縣多用空白赴上司衙門照寫每借端需索查鄉地鄰右等類及在官之人本身甘結同鄉官印結原因其人別無

可據必須取結爲憑至各衙門事件俱憑印文核辦結內不過
摘取印文數言末增所結是實一語豈印文不足憑轉以甘結
爲可信至具題事件既見之奏疏又須加結送部體制亦覺未
符請嗣後一切甘結同鄉官印結例不用文者仍舊取結其俱
題事件及詳咨文移於印文外加結者悉停止事歸便易下部
議行三十二年六月疏劾杞縣知縣蔡淮英因辦兵差借端累
民

上以阿思哈並不瞻徇下部議敍七月審蔡淮英擬杖傳

旨申飭改擬絞候三十四年六月遷雲貴總督八月因河南巡
撫任內辦驛解滇於定額外多六百餘頭

敕交部優敍九月阿思哈出銅壁關至蠻暮軍營具奏軍糧馬
匹不敷情形

諭曰前用阿思哈爲雲貴總督以其曾在北路軍營辦事諸務
尙能諳習乃伊甫至騰越卽奏該處辦糧情形已存畏難之見
及至蠻暮所奏糧馬事宜專欲仰給內地竟不知就所到之處
實力籌辦一味取巧豫占地步不復具有天良深負朕委任之

意阿思哈著革去總督給副都統銜在領隊大臣上行走以觀後效十二月授吏部侍郎三十五年

諭曰阿思哈來京召見奏對時仍申其糧馬難於措辦之說及詰以彰寶到滇後何以購備轉得充裕而前任總督竟至束手無策阿思哈始無辭以對至詰以革職後如何効力之處據稱會同大臣督率官兵攻戰其言更荒唐可笑阿思哈既革職留營卽與兵丁無異況以承受國恩大員獲罪急圖自効理應衝鋒殺賊奮不顧身乃猶覲顏附於大臣之列不肯親冒矢石以巧遂其巽懦偷安之計是誠何心其漸染積習甘於委靡無用全無滿洲勇往誠樸之氣又安望其改悔振作乎卽此一節其心更不可問而其罪更不可追仍著革職發往伊犁自備資斧効力贖罪三十九年五月

諭令回京在軍機章京上行走七月授左都御史九月大學士舒赫德剿山東壽張逆賊王倫

命偕額駙拉旺多爾濟率健銳火器兩營兵丁協剿事平下部優敘尋以拉多旺多爾濟赴城北塔灣搜剿逸賊阿思哈未經

同往

勅部嚴察議奏部議革職

詔從寬留任十一月

賜紫禁城騎馬四十一年正月署吏部尙書旋署漕運總督四月實授十月卒

賜祭葬諡莊恪

福祿蒙古正白旗人姓富察雍正五年由護軍校授三等侍衛十年擢二等侍衛乾隆二年授山西東路營參將八年遷杭州協副將十三年擢福建建寧鎮總兵七月授頭等侍衛十月擢正黃旗蒙古副都統尋授直隸宣化鎮總兵十九年調廣東右翼總兵二十二年授鑲黃旗漢軍副都統四月授參贊大臣駐烏里雅蘇台六月

命率倫兵二千赴巴里坤軍營時定邊左副將軍成袞札布率兵應參贊大臣阿桂剿逆賊舍楞福祿請備三月糧由科布多運送

從之七月至海拉爾與御前侍衛敦察會師前進八月疏劾佐

領額楞額擅放披甲烏勒噶車回游牧誘防禦托什奈之奴巴岱頂替出兵

上以額楞額故違軍律斬以徇

命福祿分遣侍衛帶索倫兵二百由哈卜塔克拜塔克等處捕西路納呼台站盜馬之瑪哈沁十一月疏報札薩克達什彭楚克副都統銜莫尼札布擒阿里卡倫盜馬賊渠布爾古特等八人已解烏里雅蘇台軍營爲從者十七人不應擅釋仍嚴飭查拏

上是之又疏報喀爾喀協理一等台吉鄂木布濟索倫佐領錫爾伯圖等獲竊卡倫牲隻之賊滿塔克等請正法下部議敍軍功加一級旋赴將軍兆惠軍營會剿逆賊霍集占二十四年正月偕定邊左副將軍富德師次呼爾璜霍集占擁騎五千餘犯我軍福祿偕領隊大臣永慶等按部伍排鎗礮麾索倫察哈爾步兵分兩翼從□至申與賊戰十餘次賊始潰十三日師次葉爾羌河岸守城賊突圍出富德同福祿等領中軍自右翼進攻追賊渡河賊屢敗時霍集占分守兩城兆惠兵至阿爾吉什偵

逆賊鄂斯璘侵和闐奏請富德福祿領兵策應

上以福祿偕策布登札布爲一隊堵截霍集占逸俄羅斯路四月

命駐和闐辦事閏六月

諭曰兆惠奏福祿在軍營頗屬効力著交部議敘給與世職部議准襲雲騎尉二次七月

命赴阿克蘇台辦事八月擢杭州將軍準噶爾平

命圖形紫光閣贊曰戰呼爾璘險艱戮力逮駐和闐亦資部勒出襄贊畫人晉庸封移鎮武林旌節雍容二十七年

上巡幸浙江福祿以駐防兵肄武教場

御製閱武詩有扈隨況有新烏什統制由來舊耿弇之句二十八年疏曰駐防漢軍一千九百餘名蒙

恩出旗補綠營糧願爲民者六百餘聽其入仁和錢塘及外縣籍無生計者二百餘臣會督臣楊廷璋等酌派嘉湖等府充補民壯惟攜眷分赴資斧維艱請按名給路費銀一兩資生銀四兩疏入准行三十二年調西安將軍三十三年領侍衛內大臣

三十四年以年老休致三十六年卒

諭曰原任領侍衛內大臣福祿患病溘逝著加恩賞銀三百兩辦理喪事仍派散秩大臣一員侍衛十員攜帶茶酒奠醢子二長強謙襲雲騎尉世職仕至湖廣督標中軍副將次薩炳阿現任頭等侍衛

富明安滿洲鑲紅旗人姓富察雍正五年由筆帖式遷戶部主事洊擢郎中乾隆十一年授廣東惠潮嘉道十三年調廣西蒼梧道十六年以前任惠潮嘉道任內失察奸民李阿萬藏匿經卷議降二級調用旋經總督陳大受檢舉以富明安雖失察於前但訪聞李阿萬等圖謀肆劫密諭潮州府飭縣拏獲例得免議前奏未經聲明應請開復並奏留兩粵補用十七年補廣東高廉道是冬調糧驛道十八年調廣西蒼梧道二十五年擢福建按察使二十六年調廣西八月遷江西布政使二十七年十月疏請南昌府同知通判二員中擇一員定爲滿缺專司繙譯部旗清字文移

上以駐防省分特設理事同知今江西並無駐防而請增滿員

有心取巧嚴飭之二十八年

特旨派往巴里坤辦事三十二年三月因廣東巡撫明山劾富明安前任廣東糧道任內浮收倉米得

旨革職解京確審軍機大臣等訊無浮收情弊九月署山西布政使三十三年九月疏言晉省驛站共二十二驛內二十驛計程七八十里者路實平坦或山徑高下不一者路不過四五十里或五十里者接送馬匹均屬裕如惟霍州霍州驛至洪洞縣普潤驛八十餘里山陂逼窄馬力易疲請於霍山普潤兩驛適中之趙城縣添設一驛卽於二十二驛內酌量抽撥馬匹議行十月護理巡撫事疏參雁平道時廷謁巡查州縣縱容家人需索任性責處輿隸得

旨革廷謁職十二月擢山東巡撫三十四年九月疏高密縣百脉湖因匯五龍河膠河諸水夏秋常致漫溢請於湖內挑濬引河引膠河之水北入膠萊運河則湖旁約有可耕地四百餘頃現委員就引河挑濬九百二十丈寬二丈深五尺已至湖心復分支河兩肢由東北至岔河入膠萊運河計長九百丈俱竣事

上嘉之先是太僕寺少卿范宜賓條奏裁減東省閉壩後水夫
工食十月富明安疏言水驛夫役向係長養在驛若閉壩後裁
減工食勢必散逸臨時僱覓倍多糜費閉壩多在十一月開壩
有早自正月者中間兩月有餘銅鉛守凍船隻均須撥役看守
請無庸裁減

上是之三十五年正月疏言濟南府屬之章邱鄒平長山新城
及青州府屬之高苑博興樂安等七縣六百餘里中有小清河
由章邱長白山發源東至新城高苑兩縣界分北條爲支脉溝
又東至博興縣分南條爲預備河其中條則仍爲小清河分宣
入樂安之淄河歸海近年七縣諸河泊水漲中都淤塞其北條
之支脉溝小清河上游水勢南條之預備河防小清河下截頂
衝亦俱壅滯以致諸水散漫東趨樂安草橋八窪一帶良田數
千頃常被水害欲弭七縣之患應從下游之樂安始臣現飭於
樂安之小清河挑淤培堤並將預備河及支脈溝大加挑濬務
使支幹通流建瓴而下仍飭上游各縣將支脉溝及小清河上
截一體挑通淤淺不特博興之夾河樂安之八溝等處數千頃

可復膏腴卽章邱鄒平長山新城高苑等縣附近湖泊地涸出必多於民生大有裨益各縣居民咸知利病切己俱願出力興工無庸動帑

諭曰有利生民之事應爲者但不可滋弊耳三十六年二月疏言東省上年伏秋多雨窪地被淹臣已設法疏通惟濟寧州西北一帶坐落運河西岸緊靠運堤爲曹州府屬之下游各路坡水匯注又以運河勢高不能放水入運遂至間段停積惟西面原有溝形可以疏導臣現將舊有溝渠五道逐一挑通使其南流入牛頭河歸昭陽湖又蘭山縣沂河西岸江風口支河一帶原建滾水石壩分洩沂水南流入駱馬湖石壩年久蟄陷一百餘丈現飭修整並查涑河一道至江風口北亦係分洩沂水南流歸運淤淺應挑者四千八百餘丈其餘墨河及響水等溝二十餘道均有淺滯現俱挑挖深通足資宣洩至濟漕東等府屬各有老窪地畝或近河湖或近海口而運河東之徒駭馬頰老黃河爲淺漲入海要途臣現飭屬相機疏濬

諭曰此實勤民之本也三十六年二月授閩浙總督五月調湖

廣總督七月疏言湖南各營千總把總向由總督考拔總督駐
劄武昌與各鎮營協有相距甚遠之地在考拔千總尙藉有廉
俸仍當赴武昌考補而弁兵考補外委額外長途往返資斧維
艱除江南岳州一營距武昌甚近其考拔外委額外仍歸督臣
餘請由提督考拔議行三十七年三月疏奏獲京山縣謀逆首
犯嚴金龍父子正法

此下原有脫文

諭曰湖廣總督富明安歷任封疆老成勤慎方資倚畀今偶患
痰喘遽爾溘逝深爲軫悼著加贈太子太保所有應得卹典該
部察例具奏尋議卹如例諡恭恪

舒赫德滿洲正白旗人祖徐元夢禮部侍郎加尙書銜諡文定
有傳雍正六年舒赫德由筆帖式授內閣中書十年遷侍讀十
三年遷監察御史在軍機處司員行走乾隆元年七月四川巡
撫王士俊密疏四事

上閱疏內有近日條陳惟在翻駁前案語發王大臣等閱看舒
赫德因劾士俊妄發狂論請明正其罪

詔逮問治罪詳士俊傳二年八月奏八旗生齒日繁盛京黑龍

江寧古塔三省土沃可墾若將八旗閒散分居三省則京城既多勁旅而根本重地更添丁壯請

勅三省將軍勘所屬可墾若干畝可駐兵若干酌定人數按戶攤給並請照舊例設公庫各省稅務歸併旗員旗地典於民者贖完現存公中收稅地分賞無地之家以十年爲期次第舉行議如所請交三省將軍詳酌妥議分庫前定議酌借一年俸餉俟二年後酌量請

旨關稅歸併旗員交戶部定議收贖民典旗地前奉

旨俟二三年後舉行存公租地交八旗定議得

旨俞允又

諭曰舒赫德條奏各省稅務歸併旗員管理甚無識見彼意以爲旗人生計艱難若管理稅務則可沾餘潤以資養贍不知國家設立關隘原以稽察奸宄利益商民並非爲收稅之員身家計也朕日以砥勵廉隅訓勉臣工尙恐其不能遵奉而可以謀利之見爲之導乎況當日旗員管理關務者亦指不勝屈惟視此以爲利藪故貪黷之風侵蝕之弊不一而足因而身罹重譴